

Omnis qui gaudetis de pace, modo verum judicate.  
 Vae, qui pro cathedris vestris sic contenditis injuste !  
 Clamatis vos solos sanctos, aliud dicitis in corde ;  
 Quia videtis et vos, multos malos abundare ubique :  
 Numquid dicere potestis, Mixti sumus intra rete ?  
 Respondetur enim vobis, jam vos illud disruptisse.  
 Neque dicere potestis, paleas vos sustinere :  
 Iterum enim respondemus, Hoc fecissetis <sup>1</sup> et ante.  
 Non enim pejores erant illo Juda traditore ;  
 Cum quo Apostoli acceperunt primum Sacramentum  
 cœnæ (*Matth. xxvi, 25; et Joan. xiii, 26*),  
 Cum tanti sceleris reum inter se jam scirent esse :  
 Nec tamen hos inquinabant sordes in alieno corde.  
 Et tamen christianos fratres audetis rebaptizare.  
 Omnes qui gaudetis de pace, modo verum judicate.  
 Audite, fratres, quod dico, et mihi irasci nolite :  
 Quia non sunt falsa quæ auditis, potestis et considerare.  
 Quid, si ipsa nunc Ecclesia vos alloquatur cum pace,  
 Et dicat : O filii mei, quid querimini de matre ?  
 Quare me deseruistis jam volo a vobis audire.  
 Accusatis fratres vestros, et ego laceror valde.  
 Quando me premebant Gentes, multa tuli cum dolore,  
 Multi me deseruerunt, sed fecerunt in timore :  
 Vos vero nullus coegit sic contra me rebellare.

<sup>1</sup> Editio Lov., fecisti. Castigatur ex aliis libris.

Dicatis mecum vos esse, sed falsum videtis esse.  
 Ego Catholica dico, et vos de Donati parte.

Jussit me Apostolus pro regibus mundi orare (I  
 Tim. ii, 1, 2) :  
 Vos invidetis quod reges jam sunt in christiana fide.  
 Si filii estis, quid invidetis quia auditæ sunt preces  
 meæ ?  
 Quando enim dona miserunt, noluitis accipiare.  
 Et oblii estis Prophetas, qui illud prædixerunt ante,  
 Quod gentium reges magni missuri essent dona Eccle-  
 siae (*Psal. lxxi, 10*) :  
 Quæ dona cum respuistis, ostendistis vos non esse :  
 Et Macarium coegistis suum dolorem vindicare (a).  
 Sed ego quid vobis feci, vestra mater in toto orbe ?  
 Expello malos quos possum : quos non possum cogor  
 ferre ;

Fero illos donec sanentur, aut separentur in fine.  
 Vos me quare dimisistis, et crucior de vestra morte ?  
 Si multum malos odistis, quales habetis videte.  
 Si et vos toleratis malos, quare non in unitate,  
 Ubi nemo rebaptizat, nec altare contra altare ?  
 Malos tantos toleratis, sed nulla bona mercede :  
 Quia quod debetis pro Christo, pro Donato vultis  
 ferre.  
 Cantamus vobis, fratres, pacem si vultis audire.  
 Venturus est judex noster ; nos damus, exigit ille.

(a) vide Optatum, lib. 5.

## ADMONITIO

### IN LIBROS CONTRA EPISTOLAM PARMENIANI.

Subsequitur opus contra Parmeniani Epistolam, in cuius operis exordio Augustinus multa se antea contra Donatistas, partim scriptis opusculis, partim tractatibus sive sermonibus ad plebem habitis, disseruisse dicit. Nempe jam scripserat epistolæ in eorum schisma quamplures : scilicet epist. 23, ad Maximum ; epist. 33, ad Proculeianum ; epist. 34 et 35, ad Eusebium ; epist. 43 et 44, ad Glorium, Eleusium et Felices ; epist. 49, ad Honoratum, et alias quasdam ante annum Christi 400 datas, quæ in tomo secundo exhibentur. Libros etiam aliquot, unum adversus Epistolam Donati Carthaginensis episcopi schismatici, et alios adversus Partem Donati duos ediderat. Liber, quem contra Epistolam Donati appellat, ad annum Christi circiter 393 pertinebat : quandoquidem hunc in libro Retractionum primo proxime post Psalmum contrâ Partem Donati ponit, testaturque a se fuisse eodem presbyterii sui tempore compositum. At vero libri duo confrâ Partem Donati, quibus in libro Retractionum secundo, ubi opuscula episcopatus sui tempore confecta recenset, locum assignavit medium inter libros de Doctrina Christiana et libros Confessionum, referendi erant ad annum Christi circiter 398. His porro duabus opusculis, quæ adhuc desiderantur, prætermisis, offerunt sese hoc loco libri tres contrâ Epistolam Parmeniani, cæteris Augustini, qui adversus Donatistas exstant, libris priores.

Parmenianus Donatistarum apud Carthaginem episcopus, Primiani præcessor, successorque Donati, notus est ex ipsius æquali, Optato Milevitano episcopo catholico, qui grande contra Parmenianum opus vulgavit. In eo tamen Optati opere nulla fit illius epistolæ mentio, quæ ab Augustino refellenda sequentibus libris suscipitur. Tichonio donatistæ scripta hæc erat a Parmeniano epistola, ut suæ communionis hominem præclarâ quædam ex Scripturis testimonia et argumenta pro Ecclesia catholica scriptis suis inserentem cohíberet. Hinc Augustinus ad Vincentium Rogatistam scribens, Epist. 93, n. 44 : « Ille est, » inquit, « Tichonius, quem Parmenianus scribendo compescit, et eum deterret ne talia scribat : non tam refellit ea ipsa quæ scribit ; sed uno, sicut supra dixi, eum premit, quod cum talia diceret de Ecclesia toto orbe diffusa, et quod neminem in ejus unitate macularent aliena peccata, ab Afrorum se tamen quasi traditorum contagione removebat, et erat in parte Donati. » Et in epistola 249 Restitutum hortatur ut legat Tichonium, qui illam « quæstionem, quomodo in Ecclesia Dei, si qua forte perversa vel etiam scelerata corrigere aut

« extinguere non valemus, salvo unitatis vinculo toleranda sint, strenue videatur tracta-  
« visse atque solvisse. »

Parmeniani Epistolam tribus libris aggreditur Augustinus. In primo, criminacionibus occurrat et injustis querelis quas ille effudit in Catholicos. In secundo et tertio, Scripturæ testimonia, quibus perperam adhibitis decipere imperitos, et separationem a malis suadere Parmenianus conabatur, expendit, et ad legitimum intellectum reducit.

Adscribendi videntur hi libri anno Christi prope 400. Nam in Retractationibus sub opere de Consensu Evangelistarum, quod ad annum circiter 400 revocavimus, collocantur. Præterea quoties hic de Optato Gildoniano loquitur Augustinus, scilicet lib. 2, capp. 1, 4, 9, 15, ipsum vita jam functum esse satis innuit; ejusque tyrannidi finem impositum (quod anno Christi 398 contigisse, ex libro secundo contra Petilianni Litteras cap. 92, postea videbimus) significat in codem contra Parmenianum libro secundo, cap. 2, ubi « Optatum Gildonianum « decennalem totius Africæ gemitum » appellat. Tandem in libro primo, cap. 9, dicit deorum « simulacula everti atque confringi jussa esse recentibus legibus. » Has vero leges non ante annum 399 ab Honorio datas nemo nescit.

Pollicetur in eodem hoc opere se alias tractaturum uberioris quæstionem de Baptismo. Promissum continenter exsolvisse ex Retractationum serie facile intelligitur, ubi libros de Baptismo conscriptos proxime huic operi subjungendos curavit.

*In subsequentes Libros contra Epistolam Parmeniani, vide lib. 2, cap. 17, Retractationum, tom. 1, col. 637, a verbis, In tribus libris, usque ad verba, Adversus Donatistas. M.*

## S. AURELII AUGUSTINI

HIPPONENSIS EPISCOPI

CONTRA

## EPISTOLAM PARMENIANI

Libri tres<sup>(a)</sup>.

## LIBER PRIMUS.

Occurrit criminacionibus et injustis Parmeniani contra Catholicos querelis; ostenditque Christianos principes pro officio a jure suo penas ad coercendos haereticos et schismaticos recte constituere.

CAPUT PRIMUM. — 1: Multa quidem alias adversus Donatistas, pro viribus quas Deus praebet, partim scribendo, partim etiam tractando disserui: nunc autem quoniam incidit in manus nostras Parmeniani quondam episcopi eorum quedam epistola, quæ scribitur ad Tichonium, hominem quidem et acri ingenio praeditum, et uberi eloquio, sed tamen donatistam, cum eum arbitraretur in hoc errare, quod ille verum coactus est confiteri; placuit potentibus, imo jubentibus fratribus, ut huic eidem Parmeniani epistolæ responderem, propter quedam maxime quæ de Scripturis testimonia non sicut accipienda sunt, accipit. Tichonius enim omnibus<sup>1</sup> sanctorum paginarum vocibus circumtusus<sup>2</sup> evigilavit, et vidit Ecclesiam Dei toto orbe diffusam, sicut de illa tanto ante per corda

et ora sanctorum prævisum atque prædictum est. Quo percepto, suscepit adversus ipsos suos demonstrare et asserere, nullius hominis quamvis sceleratum et immane peccatum præscribere promissis Dei, nec id agere quorumlibet intra Ecclesiam constitutorum quamlibet impietatem, ut fides Dei de Ecclesia futura ei diffundenda usque ad terminos orbis terræ, quæ in promissis patrum retenta et nunc exhibita est, evacuetur<sup>3</sup>. Hoc ergo Tichonius cum vehementer copiose dissereret, et ora contradicentium multis et magnis ac manifestis sanctorum Scripturarum testimoniis oppilaret; non vidit quod consequenter videndum fuit, illos videlicet in Africa Christianos pertinere ad Ecclesiam toto orbe diffusam, qui utique non istis ab ejusdem orbis communione atque unitate se-

ADMONITIO PP. BENEDICTINORUM.

Contra Epistolam Parmeniani libros castigavimus juvantibus manuscriptis Vaticanis duobus, Gallicanis quatuor, Casalino, Benigniano, Michaelino et Pratellensi, quatuor item Belgicorum variis lectionibus apud Lov. necnon collatis prioribus editionibus Am. Er. Lov.

*Comparavimus præterea eas omnes editiones initio Retr. et Confess., t. 1, memoratas. M.*

<sup>1</sup> Editio Lov., omnium.

<sup>2</sup> In MSS., circumtensus.

(a) Scripti circiter annum Christi 400.

<sup>3</sup> Editi, post, et nunc exhibita est, habent, evacueretur, Melius MSS., evacuetur.